

Bulh Nanki 'Udustl'us

John 'Uk'e Yánguz-i

Hadih nohdúsnì, ni John

¹ Si 'utso whudilhduzulh-un, ts'eke 'utahálti-un 'ink'ez buzkeh cha buts'ó k'e' usges. 'Enne buk'esi!. 'Aw si za iloh. Mbene khuni 'alha' 'unt'oh-i t'eninzunne, 'enne cha buk'e hintsi!.

² Ndi khuni 'alha' 'unt'oh neyúdizdla-i, 'ink'ez 'ilhiz wheni nebulh 'útit'elh-i, 'i gha 'udusni.

³ Yak'usda neBá 'ink'ez neMoodihti Sizi Gri neBá ooYe', 'enne huye unzoo-i, huye té'ninzun-i, 'ink'ez nedzi whudizghel-i, 'ohwhi 'ilhiz wheni nebulh óot'e!. Khuni 'alha' 'unt'oh-i 'ink'ez be lhk'e ts'utsi'-i bulh.

NeBá khuni netl'a ídan'ai-i, lhk'e ts'ootsi', ni

⁴ NeBá khuni netl'a ídan'ai-i, ts'ilhchoot k'un'a, whuz un'a whulohne nohyuzkeh khuni 'alha' 'unt'oh-i bulh hídulh. 'Et nawhus'ai whe tube hoonúst'i!.

⁵ 'Ink'ez ts'eke 'andit nts'u tédusdlíh. 'Aw khuni yugha né'ulh'ai-i, 'andidi be nts'ó k'e' usges iloh. Ndi khuni 'udechoo whuts'un t'ezninzun. Lhk'e ts'ootsi', ni.

⁶ Ndai la khuni yugha néulh'a oogha nuts'óodilh huba 'unt'oh. Ndi 'i bé lhk'e ts'utsi'-i, 'i 'unt'oh. 'Udechoo whuts'un dahts'o ndi khuni yugha néulh'a, 'i ooghá nohdilh huba' hoont'oh.

Lhane dune nana'áhne yun k'é hindil, 'et huwa khahdlì

⁷ Lhane dune nana'áhne yun k'é hindil 'et huwa. Ndunt'ohne 'aw Sizi Gri ndi yun k'ut duyust'e be nuséya lhuhudusni. Ndunt'oh-un, 'en dune nana'ah-un 'unt'oh 'ink'ez Gri ch'az ditni-un cha 'unt'oh.

⁸ Nohnich'oh khahdlì! Ndai 'ut'en beni 'uts'it'en-i ninta ts'ooel'h whuch'a. 'Et de la soo cho neba 'uk'elha hóle!.

⁹ Mbe ninta' 'ut'ih-un 'ink'ez Gri khuni be ooghu yaduk-i, 'aw lhuyóotun de, 'aw Yak'usda cha lhít'ih. Mbe la ndi Gri ooghu yaduk-i yoontun de, neBá duYe' bulh nahúlt'oh ubut'i whé 'unt'oh.

¹⁰ Mbe Gri ooghu yaduk-i lhuyóotun-un whunoh dutilh'eh huba nohghu ninya de, ndunt'oh-un 'aw nohyoh daóoya' junih, k'us danínyaih dóhni' junih!

¹¹ Mbe danínyaih yúlhni-un, 'en cha tank'us ne'út'en-un yula 'ut'en whe 'unt'oh 'et huwa.

John 'ubulhni, “Ilhudzin de nohts'u tisyalh hukwa' nuszun”

¹² Lhat-un huwun nohts'ó k'e tisgus, 'aw 'udustl'us 'ink'ez 'udustl'us too' be iloh. Nohts'u tisyalh 'ink'ez soo nohnin ts'e nohbulh yatisduk 'et hukwa' nuszun. 'Et de la tube cho ts'uhót'e'.

¹³ Nohulhtus 'utahálti-un buzkeh, 'enne hadih nohuhútni. 'Et ndo honeh.